

巢氏病源



重刊巢氏諸病源候總論卷二十三

中惡病諸候

凡十四論

中惡候

中惡者是人精神衰弱爲鬼神之氣卒中之也夫人陰陽順理榮衛調平神守則強邪不干正若將攝失宜精神衰弱便中鬼毒之氣其狀卒然心腹刺痛悶亂欲死凡卒中惡腹大而滿者診其脈緊大而浮者死緊細而微者生又中惡吐血數升脈沈數細者死浮焱如疾者生中惡者差後餘勢停滯發作則變成

注

中惡死候

中鬼邪之氣卒然心腹絞痛悶絕此是客邪暴盛陰陽爲之離
絕上下不通故氣暴厥絕如死良久其真氣復生也而有乘年
之衰逢月之空失時之和謂之三虛三虛而府藏衰弱精神微
羸中之則真氣絕竭則死其得瘥者若餘勢停滯發作則變成
注

尸厥候

尸厥者陰氣逆也此由陽脈卒下墜陰脈卒上升陰陽離居榮
衛不通真氣厥亂客邪乘之其狀如死猶微有息而不恆脈尙

動而形無知也聽其耳內循循有如嘯之聲而股間暖是也耳內雖無嘯聲而脈動者故當以尸厥治之診其寸口脈沈大而滑沈卽爲實滑卽爲氣實氣相搏身溫而汗此爲入府雖卒厥不知人氣復則自愈也若脣正青身冷此爲入藏亦卒厥不知人卽死候其左手關上脈陰陽俱虛者足厥陰足少陽俱虛也病苦恍惚尸厥不知人妄有所見

卒死候

卒死者由三虛而遇賊風所爲也三虛謂乘年之衰一也逢月之虛二也失時之和三也人有此三虛而爲賊風所傷使陰氣

偏竭於內陽氣阻隔於外二氣壅閉故暴絕如死若府藏氣未竭者良久乃蘇然亦有挾鬼神之氣而卒死者皆有頃邪退乃活也凡中惡及卒忤卒然氣絕其後得蘇若其邪氣不盡者得滯心腹或心腹痛或身體沈重不能飲食而成宿疹皆變成

卒忤候

卒忤者亦名客忤謂邪客之氣卒犯忤人精神也此是鬼厲之毒氣中惡之類人有魂魄衰弱者則爲鬼氣所犯忤喜於道間門外得之其狀心腹絞痛脹滿氣衝心胃或卽悶絕不復識人肉色變異府藏虛竭者不卽治乃至於死然其毒氣有輕重輕

者微治而瘥重者侵剋府藏雖當時救療餘氣停滯久後猶發
乃變成注

卒忤死候

犯卒忤客邪鬼氣卒急傷人入於府藏使陰陽離絕氣血暴不
通流奄然厥絕如死狀也良久陰陽之氣和乃蘇若府藏虛弱
者卽死亦有雖瘥而毒氣不盡時發則心腹利痛連滯變成注

鬼擊候

鬼擊者謂鬼厲之氣擊著於人也得之無漸卒著如人以刀矛
刺狀胷脇腹內絞急切痛不可仰按或吐血或鼻中出血或下

血一名爲鬼排言鬼排觸於人也人有氣血虛弱精魂衰微忽與鬼神遇相觸突致爲其所排擊輕者困而獲免重者多死

卒魘候

卒魘者屈也謂夢裏爲鬼邪之所魘屈人臥不悟皆是魂魄外遊爲他邪所執錄欲還未得致成魘也忌火照火照則神魂遂不復入乃至於死而人有於燈光前魘者是本由明出是以不忌火也其湯熨針石別有正方補養宣導今附於後

養生方導引法云拘魂門制魄戶名曰握固法屈大母指著四小指內指抱之積習不止眠時亦不開令人不魘魅



又云人魘勿然明喚之魘死不疑闇喚之唯好得遠喚亦不得近而急喚亦喜失魂魄也

魘不寤候

人眠睡則魂魄外遊爲鬼邪所魘屈其精神弱者魘則久不得寤乃至氣暴絕所以須傍人助喚并以方術治之乃蘇

自縊死候

人有不得意志者多生忿恨往往自縊以繩物係頸自懸挂致死呼爲自縊若覺早雖已死徐徐捧下其陰陽經絡雖暴壅閉而藏府真氣故有未盡所以猶可救療故有得活者若見其懸

挂便忽遽截斷其繩舊云則不可救此言氣已壅閉繩忽暴斷其氣雖通而奔逆運悶故則氣不能還卽不得復生又云自縊死旦至暮雖已冷必可治暮至旦則難治此謂其晝則陽盛其氣易通夜則陰盛其氣難通

又云夏則夜短又熱則易活又云氣雖已斷而心微溫者一日已上猶可活也

溺死候

人爲水所沒溺水從孔竅入灌注府藏其氣壅閉故死若早拯救得出卽泄瀉其水令氣血得通便得活又云經半日及一日



猶可活氣若已絕心上暖亦可治

中熱暍候

夏月炎氣人冒涉途路熱毒入內與五藏相并客邪熾盛或
瘀不宜致陰氣卒絕陽氣暴壅經絡不通故奄然悶絕謂之暍
然此乃外邪所擊真藏未壞若便遇治救氣宜則蘇夫熱暍不
可得冷得冷便死此謂外卒以冷觸其熱蘊積於內不得宣發
故也

冒熱困乏候

人盛暑之時觸冒大熱熱毒氣入藏府則令人煩悶鬱冒至於

困乏也

凍死候

人有在於途路逢淒風苦雨繁霜大雪衣服霑濡冷氣入藏致令陰氣閉於內陽氣絕於外榮衛結澀不復流通故致噤絕而死若早得救療血溫氣通則生又云凍死一日猶可治過此則不可

尸病諸候

凡十二論

諸尸候

人身內自有三尸諸蟲與人俱生而此蟲忌血惡能與鬼靈相



通常接引外邪爲人患害其發作之狀或沈沈默默不的知所苦而無處不惡或腹痛脹急或礫塊踊起或攣引腰脊或精神雜錯變狀多端其病大體略同而有小異但以一方治之者故名諸尸也

飛尸候

飛尸者發無由漸忽然而至若飛走之急疾故謂之飛尸其狀心腹刺痛氣息喘急脹滿上衝心胃者是也

遁尸候

遁尸者言其停遁在人肌肉血脈之間若卒有犯觸卽發動亦

令人心腹脹滿刺痛氣息喘急傍攻兩脇上衝心胃復發
停遁不消故謂之遁尸也

沈尸候

沈尸者發時亦心腹絞痛脹滿喘息衝刺心胃攻擊脇肋雖歇
之後猶沈痼在人府藏令人四體無處不惡故謂之沈尸

風尸候

風尸者在人四肢循環經絡其狀冷躍去來沈沈默默不知痛
處若衝風則發是也

尸注候

尸注病者則是五尸內之尸注而挾外鬼邪之氣流注身體令人寒熱淋瀝沈沈默默不知所苦而無處不惡或腹痛脹滿喘急不得氣息上衝心胷傍攻兩脇或礫塊踊起或攣引腰脊或舉身沈重精神雜錯恆覺惛謬每節氣改變輒致大惡積月累年漸就頓滯以至於死死後復易傍人乃至滅門以其尸病注易傍人故爲尸注

伏尸候

伏尸者謂其病隱伏在人五藏內積年不除未發之時身體平調都如無患若發動則心腹刺痛脹滿喘急其湯熨針石別有

正方補養宜導今附於後

養生方導引法云叩齒二七過輒咽氣二七過如此三百通乃止爲之二十日日邪氣悉去六十日小病愈百日大病除伏尸皆去面體光澤

陰尸候

陰尸者由體虛受於外邪搏於陰氣陰氣壅積初著之狀起於皮膚內卒有物狀似蝦蟇經宿與身內尸蟲相搏如杯大動搖掣痛不可堪忍此多因天雨得之過數日不治卽死

冷尸候

冷尸者由是身內尸蟲與外邪相接引爲病發動亦心腹脹滿刺痛氣急但因觸冷卽發故謂之冷尸

寒尸候

寒尸者由身內尸蟲與外邪相引接所成發動亦令人心腹脹滿刺痛但以其至冬月感於寒氣則發故謂之寒尸

喪尸候

人有年命衰弱至於喪死之處而心意忽有所畏惡其身內尸蟲性旣忌惡便更接引外邪共爲疹病其發亦心腹刺痛脹滿氣急但逢喪處其病則發故謂之喪尸

尸氣候

人有觸值死尸或臨尸其尸氣入腹內與尸蟲相接成病其發亦心腹刺痛脹滿氣急但聞尸氣則發故謂之尸氣

重刊巢氏諸病源候總論卷二十三終

